

आकाशवाणी रायपुर (छत्तीसगढ़)
प्रादेशिक समाचार

18.45 मंगलवार

02.06.2026

प्रमुख समाचार –

- 1— नगरीय निकाय चुनाव के तहत चार जून के होही मतगणना—इही दिन पंचायत चुनाव के परिणाम घोषित करे जाही।
- 2— सुशासन तिहार के तहत मुख्यमंत्री विष्णुदेव साय आज बीजापुर जिला के कोंडापल्ली गांव पहुंचीन—ए दउरान ओमन ह जनचौपाल के माध्यम ले लोगन संग गोठबात करीन।
- 3— धमतरी ह देस के पहिली अइसन जिला बन गे हवय, जिहां सहकारी समिति मनके माध्यम ले किसान मन ल ड्रोन स्प्रेयर के सुविधा देवाय जाही।

राष्ट्रपति—जनजातीय छात्रवृत्ति योजना

राष्ट्रपति द्रौपदी मुर्मु ह कहिन हे कि शिक्षा, ससक्तिकरण के एक ठिन सक्तिसाली साधन हे। शिक्षा लोगन मन ल आत्मनिर्भर, जागरूक अउ सक्षम बनाथे। आज नई दिल्ली म जनजातीय छात्रवृत्ति योजना के लाभार्थी मन ल संबोधित करत राष्ट्रपति ह कहिन कि सही विकास तभे संभव हे, जब समाज के सबो वर्ग सामाजिक, आर्थिक अउ सैक्षिक रूप ले प्रगति करयं।

राष्ट्रपति ह कहिन कि युवा मन ह राष्ट्र के सक्ति, आशा अउ उज्ज्वल भविष्य के प्रतिनिधित्व करथे। ओमन ह युवा मन ले विशेषकर जनजातीय समुदाय के युवा मन ल आग्रह करीन कि ओमन ह अपन जड़ ल सुरता राखय।

त्रिस्तरीय पंचायत चुनाव

राज्य म नगरीय निकाय अउ त्रि—स्तरीय पंचायत के आम अउ उप निर्वाचन बर मतदान काली सांतिपूर्ण ढंग ले होइस। राज्य निर्वाचन आयोग के अनुसार नगरीय निकाय म अध्यक्ष अउ पार्षद पद बर होय मतदान म चौरासी दशमलव पांच—आठ प्रतिशत मतदाता मन ह अपन मताधिकार के प्रयोग करीन। उहें, त्रि—स्तरीय पंचायत म जनपद सदस्य, सरंपच अउ पंच के पद बर अठहत्तर दशमलव छह—एक प्रतिशत मतदान दर्ज करे गीस।

आयोग ह बतईस कि मतदान के दउरान कोनों भी क्षेत्र ले अप्रिय घटना के सूचना नइ मिले हे। नगरीय निकाय के मत के गिनती चार जून के करे जाही। उहें, त्रि—स्तरीय पंचायत बर होय मतदान के बाद मतगणना मतदान स्थल म ही कराय गीस, जेखर परिणाम के घोषणा चार जून के करे जाही।

सुशासन तिहार—मुख्यमंत्री

सुशासन तिहार के तहत मुख्यमंत्री विष्णुदेव साय आज बीजापुर जिला के कोंडापल्ली गांव पहुंचीन। ए दउरान ओमन ह जनचौपाल के माध्यम ले लोगन के समस्या सुनीन। मुख्यमंत्री ह अधिकारी मन ल निरदेस दीन कि जनचौपाल म मिले सबो आवेदन अउ समस्या के समय—सीमा म निपटारा करे जाय। श्री साय ह कहिन कि सुशासन तिहार सिरिफ एक ठिन प्रशासनिक अभियान नइ हे, फेर ए ह सरकार अउ जनता के बीच विश्वास ल अउ जादा मजबूत करे के माध्यम हे। मुख्यमंत्री ह ग्रामीण मन ल भरोसा देवईन कि उंखर समस्या के निपटारा बर सरकार ह पूरा जिम्मेदारी ले काम करत हे। जनचौपाल के दउरान मुख्यमंत्री ह आने—आने विभाग मन डहार ले लगाय गे स्टाल के अवलोकन करीन। उहें, हितग्राही मन ल वन अधिकार मान्यता पत्र, जाति अउ निवास प्रमाण पत्र, प्रधानमंत्री आवास योजना, श्रम कार्ड, किसान हितग्राही योजना संघरा दूसर योजना मनके बारे म जानकारी दीन। मुख्यमंत्री ह आत्मसमर्पित

माओवादी दंपत्ति मन डहार ले संचालित किराना दुकान घलो पहुंचीन अउ उंखर जीवन म आय सुधर बदलाव के तारीफ करीन।

एखर पहिली मुख्यमंत्री श्री साय काली नारायणपुर जिला के अबूझमाड़ क्षेत्र के गारपा अउ कोंडागांव जिला के बड़ेकनेरा पहुंचीन। गारपा म राखे गे जनचौपाल म मुख्यमंत्री ह ग्रामीण मन ले सोझे गोठबात करके उंखर मनके समस्या सुनीन अउ क्षेत्र बर स्वास्थ्य, सड़क, शिक्षा अउ सुरक्षा ले जुड़े कतकोन विकास काम के घोसना करीन। उहें, बड़ेकनेरा म राखे गे समाधान सिविर म ओमन ह कोंडागांव जिला बर एक सौ बावन करोड़ रूपिया ले जादा के तिरालीस ठन विकास काम के लोकार्पण अउ भूमिपूजन करीन।

रेहड़ी-पटरी कारोबार

प्रदेस म रेहड़ी-पटरी कारोबारी मन ल आर्थिक रूप ले मजबूत बनाय बर एक ले तीस जून तक स्वनिधि महोत्सव अउ लोक कल्याण मेला के आयोजन करे जावत हे। नगरीय प्रशासन अउ विकास विभाग डहार ले राखे गे ए अभियान म स्ट्रीट वेंडर्स मन ल ऋण सुविधा, यूपीआई अउ क्यूआर कोड जइसन डिजिटल सेवा देवाय जाही। संगेसंग ओमन ल जनधन, आयुष्मान भारत, सामाजिक सुरक्षा बीमा अउ दूसर जनकल्याणकारी योजना मन ले घलो जोड़े जाही।

धमतरी-ड्रोन स्पेयर सुविधा

धमतरी जिला ह देस के पहिली असइन जिला बन गे हवय, जिहां प्राथमिक कृषि साख सहकारी समिति यानी पैक्स के माध्यम ले किसान मन ल ड्रोन स्पेयेर के सुविधा देवाय जाही। कलेक्टर अबिनाश मिश्रा के अगुवई म जिला के दस ठन पैक्स समिति म ए सुविधा सुरू करे गेहे। लोहरसी म राखे गे कार्यक्रम म ए पहल के सुरुआत करे गीस अउ प्रसिक्षित ड्रोन पायलट मन ह ड्रोन स्पेयर के प्रदर्शन करीन। अधिकारी मनके अनुसार ड्रोन तकनीक ले उर्वरक अउ कीटनासक के छिड़काव कमती बेरा अउ कमती लागत म करे जा सकही।

यात्री बस किराया

राज्य म यात्री बस के किराया म बढ़ोतरी ल लेके परिवहन विभाग ह बस संचालक मन संघरा बइठका करके उंखर समस्या अउ मांग के बारे म गोठबात करीन। बस संचालक मन ह बतईन कि बछर दू हजार इक्कीस के बाद ले किराया म बढ़ोतरी नइ होय हे, फेर डीजल के कीमत म सरलग बढ़ोतरी होय हे। ओमन ह डीजल के दाम के अनुसार किराया तय करे बर स्थायी व्यवस्था बनाय के मांग करीन। परिवहन विभाग ह केहे हे कि दूसर राज्य के किराया दर के अध्ययन करके जल्दी फइसला करे जाही।

विश्व पर्यावरण दिवस-प्रतियोगिता

विश्व पर्यावरण दिवस के मउका म देहरादून म राखे गे कार्यक्रम म नारायणपुर के लिंगो मुदियाल कृषि महाविद्यालय अउ अनुसंधान केन्द्र ल ""पर्यावरण चैंपियन अवॉर्ड"" ले सम्मानित करे गेहे। लिंगो मुदियाल कृषि महाविद्यालय अउ अनुसंधान केन्द्र डहार ले पाछु बछर म जैविक खेती ल बढ़ावा दे बर, वृक्षारोपण अभियान, जल संरक्षण गतिविधि, नशामुक्ति जनजागरुकता कार्यक्रम, किसान अउ विद्यार्थी मन बर प्रसिक्षण अउ जैव विविधता संरक्षण के क्षेत्र म सुधर काम करे गेहे।

उहें, गौरेला-पेण्ड्रा-मरवाही जिला के सेमरा के स्वामी आत्मानंद सासकीय विद्यालय ल घलो राष्ट्रीय स्तर के ""पर्यावरण चैंपियन अवॉर्ड"" दे जाही। ए विद्यालय के चयन पर्यावरण संरक्षण, जल संरक्षण अउ स्वच्छता ले जुड़े काम म सुधर प्रदर्शन बर करे गेहे।

उहें, विश्व पर्यावरण दिवस म पांच जून के रईपुर म छत्तीसगढ़ पर्यावरण संरक्षण मंडल डहार ले पोस्ट प्रतियोगिता आयोजित करे जाही। "प्रकृति से प्रेरित होकर जलवायु और भविष्य

का संरक्षण करें” बिसय म होवइया ए प्रतियोगिता म चार आयु वर्ग के प्रतिभागी मन ह भाग ले सकही।

समर स्पेशल ट्रेन

रेलवे प्रशासन ह यात्री मनके सुविधा बर रायपुर-कोरबा-रायपुर हसदेव एक्सप्रेस ल एक अगस्त ले हर दिन चलाय के फइसला लेहे। उहें, ग्रीष्मकालीन अवकाश के दउरान बिलासपुर अउ यलहंका-बेंगलुरु के बीच तीन जून ले दू जुलाई तक पांच-पांच चक्कर बर समर स्पेशल ट्रेन घलो चलाय जाही।

मौसम

अवइया चौबीस घंटा के दउरान प्रदेस एक-दू जघा म हल्का बरसा होय के या गरज-चमक के संग छीटा पड़े के संभावना हवय। मौसम विभाग के अनुसार एक ठन ऊपरी हवा के चक्रीय चक्रवाती घेरा पूर्वी मध्यप्रदेश अउ ओखर ले लगे छत्तीसगढ़ के उपर विस्तारित हे। उहें, एक ठन दूसर द्रोणिका मध्य पाकिस्तान ले तटीय पश्चिम बंगाल तक छत्तीसगढ़ होवत बने हे। एखर असर ले प्रदेस म काली एक-दू जघा म अधंड चले के अउ आकाशीय बिजली गिरे के आसंका हे।

संक्षिप्त समाचार

— केन्द्रीय माध्यमिक शिक्षा बोर्ड-सीबीएसई ह बताय हे कि उत्तर पुस्तिका म पाय गे गलती के सत्यापन अउ ओखर पुनर्मूल्यांकन बर पोर्टल आज ले सुरू हगे हे। ए पोर्टल छह जून तक खुल्ला रइही।

— खाद्य मंत्री दयालदास बघेल के अध्यक्षता म काली मंत्रालय म मंत्रिमंडलीय उप समिति के बइठका होइस। बइठका म पाछु खरीफ विपणन बछर म समर्थन मूल्य म खरीदे गे धान के निष्पादन अउ कस्टम मिलिंग अउ अवइया खरीफ सीजन म धान खरीदी के तियारी के बारे म चर्चा करे गीस।

— रईपुर जिला के दिव्यांग युवा मन ल रोजगार ले जोड़े बर रोजगार कार्यालय रईपुर डहार ले पांच जून के बैरन बाजार के सासकीय कन्या पॉलीटेक्निक कॉलेज म बिसेस रोजगार मेला के आयोजन करे जाही।

— कोरबा जिला के पाली थाना क्षेत्र म भीमसेनिया जंगल तीर पाछु संझा होय एक ठन सड़क हादसा म फटफटी म बइठे एक इन युवक के मउत होगीस। उहें एक झिन दूसर युवक ह गंभीर रूप ले घायल हगे हे।

